

strumenti parte, & obseruabis earū concurrentem punctū. Inuentis duabus his notis, expandes circinum ab una nota in aliam, & acceptam intercapedinem applicabis scalæ miliarium, & inuenies distantiam in miliaribus Germanicis. Quod si duo loca in longitudine, usq̄ adeò distiterint, ut medietatem differentię longitudinis in ipso instrumento inuenire nequeas, accipe medietatis illius mediam partem, id est, quartā partem integrę differentię longitudinis, & serua eam. Deinde subtrahe minorem latitudinem à maiori latitudine, & relictę differentię quartam partem adde minori latitudini & subtrahe à maiori latitudine, quo facto, ages cum quarta parte differentię lōgitudinis & cū duabus latitudinibus rectificatis, ut prius egisti, quando cum medietate differentię longitudinis & integris latitudinibus instrumentum ingredi iussus es. Miliaria tamen quę ex hac operatione proueniunt sunt duplicanda. Exemplum. Cupio scire distantiam quę est inter Basileam & Hierosolymā, & Basileę quidem longitudinem inuenio gradus 28. m̄. 0. Latitudinē uerò grad. 47. m̄. 10. Hierosolymę longitud. 66. grad. m̄. 0. latitud. autē grad. 31. m̄. 40. Subtrahe q̄q̄ minori longitudine à maiori, colligo differentiam 38. graduum, cuius medietatē, nempe 19. gradus cū latitudine Hierosolymitana grad. 31. m̄. 40. quęro in dextra parte instrumenti & facio punctū. Deinde eandem differentię medietatem cum latitudine Basilię grad. 47. m̄. 10. quęro in sinistra parte instrumenti & facio notam. Inuentis duabus notis, excipio circino distantiam earū, applicoq̄ circinum sic expansum scalę miliarium & inuenio miliaria Germanica, quę sunt à Basilea ad Hierosolymam circiter quingenta.

